

ЛҮИМА СЭРИПОС



www.khanty-yasang.ru

Общественно-политическая газета

E-mail: luima@ugracom.ru

20 октября
2014 года
№20
(1086)

Основана 11 февраля 1989 года



Ты хурит Хуломсунтыт олнэ мӓньщи ӓгирйшкве Полина Бынгилева
пӓслым олы. Ты тал тав овыл классыт ханищтахгужкв патыс. Тав мӓнь ӱльпа
ман унттуме порат пӓслувес.

А. Алтадьева баарум хури

Ты
номерт
ЛОВИНЫТЭН:

Соссаң мир
мӓгсыл хансым
нэпакыт

2

ӱльпа щахыл

8

Тав мӓщтырлаңкв
такви ханищтахты

10

Мӓньщи
хӱтпаг
потрӓн

13

Ӑлнэ мӓвт
хӱлом пӓсың
лӓңхе

16

ЛЯХХАЛЫТ

Сăккон хаснэ хотпат сапрăнияныл ăлыс

Ты этпос 14 хоталэт округ Думат рупитан депутатит савсыр сакконит пирмайтасыт.

Округувт рупитан саккон щирыл, ань вина этипала 8 щес муслăпкат тыналаве. Това депутатит лăвэгыт, ты саккон мот щирыл хансуңке эри ос вина этипала 10 щес пора мус вос тыналаве. Махум мощчанув вина аюңке ат патсыт. Ань махум хумус вăрэгыт, лăпка лап-пантнэ элы-палт савнув

вина євтэгыт ос тувыл пулиг-айхатэгыт, мори та капыртэгыт. Лăпкат йти мус вина тыналаңке ке патаве, тѧн тох вăруңке ат патэгыт.

Борис Хохряков ос лăвыс, махум ань сака сав вина ат аегыт ос люль сака ат вăрэгыт. Ты саккон емащакв рупиты, тѧла тал мот-мот щирыл

таве хансуңке ат эри.

Сапрăнит махум ос акв йильпи вăрмалъ урыл потыртасыт. Кăсың элумхолас олнэ колэ магсыл налог-олн ойты. Ань «налоговый кодекс» яныг нэпакт мот вăрмалъ урыл хасвес, тыи магсыл округувт ос тамле саккон пирмайтавес. Мѧн олнэ коланув магсыл «кадастровый оценка» нампа нэпак щирыл налог-олн ойтуңке тах патэв. Ты

нэпакыт кол тынэ янгыгхансаве, тыи магсыл сав олнтув ойтуңке тах патэв. Йильпи налог-олн мѧн 2016 тал пасныл ойтуңке ăвылтахтэв. Кўщайт лăвэгыт, тыщирыл округ бюджетн сав олн ювле єхтуңке паты тах.

Акв та порат махум 2015 ос 2016-2017 талыт кастыл хансым бюджет урыл ăвыл щес потыртасыт. Мот сапрăнит тѧн ты саккон урыл потыртаңке ос тах патэгыт.

**Людмила
ТАСМАНОВА**

Соссаң мир магсыл хансым нэпакыт



Геннадий Бухтин, губернатор вѧнын хум, соссаң махум ос савсыр департаментит рупитан хотпат сапрăнин вѧвыгласанэ. Тѧн тот мѧныщит, хантыт ос єрн мирыт культураныл ос щѧнэ лѧтѧныл ханищтан нэпакыт урыл потыртасыт.

Ќвлэт Дмитрий Осминкин, общественный связь департаментит рупитан хум, лăтың лăвыс. Тав лăвнэтэ щирыл, ты тал сыс тѧн 4 сѳтыра 800 савит нэпак тѧратасыт. Ты халт тѧн Еремей Айпин, округ Думат соссаң махум Ассамблея кўщай хум, «Божья мать в кровавых снегах» нэпаке ос Владимир Генов, «Ханты ясаң» газетат рупитан хум, мѳйтанэ ос сав мот махум хансум нэпаканыл тѧратасыт.

Ань сав элумхолас тѧнки нэпаканыл тѧн палтаныл тотыяныл. Ты нэпакыт тѧратан магсыл 14 миллион солкѳви тах эрмыглы, ты тал тѧн туп хўрум миллион солкѳвил майвѳсыт. Дмитрий Осминкин лăвыс, соссаң махум пѳс йис вѧрмаляныл ос лѧтѧныл урыл хансым нэпакыт магсыл савнув олн тѧстуңке эри.

Надежда Казначеева, культура Департамент кўщай нѧ, ты урыл ос потыртас. Тал сыс

соссаң махум пѳс йис вѧрмаляныл элалъ тотнэ магсыляныгсѧтарыгкем савсыр ханищтапыт, ялпың хоталыт ос мот тѧлат вѧрыгласыт. Округ янытыл рупитан библиотекат ань соссаң махум урыл хансым 7 сѳтыра 200 нэпак ѳлы. Ань таи ємас, това нэпакыт интернет хосыт ловиньтаңке рѳви.

Ханищтап щирыл рупитан департамент манхурип рупата вѧри, ты урыл Ирина Лисютина лăтың лăвыс. Ань Ас-угорский институтт рупитан хотпат нѧврамыт магсыл мѧныщи ос ханты лѧтѧныл ханищтан нэпакыт хансѳгыт, тѧратэгыт. Югорский университетт

соссаң махум магсыл ань институт вѧрвес. Тот мѧныщи, ханты ос єрн нѧврамыт ханищтавет.

Сапрăнит махум ханты мир алфавит урыл потыртасыт. Евдокия Андреевна Нѳмысова, ханты мир учѳный ѳква, мот учѳный-хотпат єт йильпи алфавит вѧруңке таңхэгыт, ты вѧрмалъ урыл хот-ѧти акваг потыртэгыт. Геннадий Бухтин тѧн нупланыл лăвыс, ѳвлэт ханты лѧтѧныл нѧврамыт ханищтан хотпат ос газета ловиньтан махум воскитыглыяныл, хоты алфавит тананыл артми, ос та юи-пѧлт ущ алфавитаныл мот щирыл вос хансыяныл.

Людмила ТЕТКИНА

Агит-пыгыт тākсарыг яныгмēгыт

Нягань ұст нйврамыт магыс «Патриот»
Нампа ханищтан ос ўщлахтын кол ҕлы.
Округ губернатор Наталья Комарова та ўсн
ялме порат тув щалтсас ос тот рўпитан хōтпат,
агирищит-пыгрищит ёт вайхатас.

Нйврамыт нила
тэлалытн тот элалъ ха-
нищтавет. Пыгыт ар-
мият лусытан магыс
тākсар хōтпаг олўкве
щēпитавет ос самын
патум мәнаныл вос
эруптасаныл. Пусталыг
ос ёрыг олнэ магыс
савсыр спортивный кол-
накыт тот рўпитэгыт.
Лув тармыл яласаңкве
ханищтавет. Тувыл вōрт
хумус олўкве рōви,
нйврамыт мәнътагыл
тамле вāрмалит вāңкве
ос ханищтавет.

Наталья Комаро-
ва, округ Дума кўшай
хум Борис Хохряков ос
мōт кўшайт овлэт кас-
нэ колнакыт суссыт.
Акв колнакт агирищит-
пыгрищит мēчикыл ён-
гасасыт, мōт колнакыт
писалил патлумтасыт.

Губернатор нэ писалъ
катн вуйлас, тав ос мощ
пātлуптаңкве таңхыс.

Тувыл мўй хōтпат
«Афганец» нампа клубн
ялантан нйврамыт ёт
хōнтхатыгласыт. Андрей
Еськов, тот пуңктотнэ
хум, савсыр ханищта-
пыт урыл потыртас.
Нйврамыт маныр тот
варēгыт, ты овылтыт
кина суссылтас.

Тōва пыгрищит па-
рашютыл поргункве
хасэгыт, мōтаныт аква-
лангылвиттмўрсалэгыт.
Туи нёр ляпан тоты-
главет, тән альпини-
стыт холът хāхталахтын
яласэгыт. Пуссын ты
варнэ ёнгилыт кастыл
тән ёрыг, тākсарыг
ёмтэгыт. Мощёртын
школа ГТО нормат
варуңкве патавет. Ты



нйврамыт тай ёмщак-
вег ханыщувлым олэгыт.
Тән ань сыресыр ка-
сылын тотыглавет ос
тот нōх-патэгыт. Юи-
овыл талытыт ты клубн
агирищит ялантаңкве
ос кāсасэгыт. Тәнанылн
тот пўмыщ, тән аквтох
пёрщункве, пилталыг
парашютыл поргункве
таңхэгыт.

Армияныл ёхтум
хўрум пыгыт яныг
кўшайт ёт ос потырта-
сыт. Тән «Патриот» цен-
трын мәнътагыл ялан-
тасыт. Тот ханищтам
вāрмалит лусытыма-

ныл сус пуссын сака
эрмыгласыт.

Нягань ұст олнэ
хōтпат ты ханищтан ос
ўщлахтын центраныл
сака янытлыяныл. Ту-
выл нйврамыт губерна-
тор нән лāvвэсыт: «Ань
Украина мāныл тыг сав
мāхумёхтэгыт. Тувыл ёх-
тум нйврамыт нән ётын
школа ханищтахтуңкве
патэгыт ке, манос ты
центрын ялантаңкве
патэгыт – нән тәнанылн
нётән, тән ётаныл ак-
втох журтыңыщ олән».

Тамара МЕРОВА

Яныгпāла хōтпат нётавет

Ты ётпост Мария Геннадьевна Краско,
мирн нётмил вāрнэ Департаментыт
рўпитан кўшай нэ, ляххал тотнэ мāхум акван-
атыгласанэ. Ань яныгпāла хōтпат ос нусаг олнэ
мāхум маныр нётмилыл вāравет, тав ты урыл
потыртас. Нән тав потре элалъ ловиньтэлън:

- Нән пуссын вāглың,
округувт олнэ яныгпāла
хōтпат, экват - 55 тал,
ойкат - 60 тал порат
пенсиян минэгыт. Мән
лўи мāt олэв, таимāгыс
сартыннув пенсиян
минэв. Яныгпāла хōтпат
магыс нётмилыт пуссын
лакквa-уртым олэгыт.
Яныг хōнт порат хōнтлум
хōтпат, хōнт порат юн
савсыр рўпата вāрум
хōтпатос мōтсавсыр мāt
хōнтлум мāхум янасши-
рыл нётавет.

Округувт атхуйплов

арыгкем тал рўпитам
яныгпāла хōтпат, пен-
сияныл коньпал губер-
натор пāлыл арыг ол-
ныл ойтавет. Тән ань
пуссын пенсия-олнвинэ
мāхманув округ яныт-
лан хōталкастылаквщес
премия-олныл майла-
вет. Тувыл хотьют «Со-
трудничество» нампа
программа щирыл Тю-
мень ўсн олўквеминас,
та хōтпат ос ат ёрувла-
вет, тән тот ос премия-
олныл ойтавет.

Яныгпāла хōтпат

ты вāрмалъ щирыл
акваг нётавет: ол-
ныл мивет, путёв-
ка щирыл ўщлахтын
мāн кётыглавет, ўлщ-
пуңкыл ўнттавет ос
тэрпил мивет. Рос-
сия янытыл яныгпāла
хōтпатлов сōтыра арыг-
тем пенсия-олн выгыт.
Югра мāt мāхманув
ос хōтхуйплов сōтыра
арыгтем солкōвил ой-
тавет.

Хōнтлум мāхманув ос
хотьют ущтынув пен-
сиян патсыт, тән тыгыл
иң сāvнув пенсия-ол-
ныл ойтавет. Ос тамле
хōтпат олэгыт, хотьют
матыр вāрмалъ щир-
ыл шар мощца пен-
сия-олныл ойтаве. Ты
тэла щирыл ань ос яныг

рўпата вāраве. Мощца
олн винэ хōтпат пенси-
яныл лāщал-лāщал нōх-
нётуңкве тах патаве.

Округувт пуссын ак-
ввёт 387 сōтыра пенсия-
олн винэ хōтпа олы.
Агмың-мосың хōтпат
ос шāнь-ащ тал хультум
нйврамыт ос тув пуссын
акван-ловиньтавет.

Мария Геннадьевна ос
акв вāрмалъ урыл потыр-
тас. Мōтынтыг яныг хōнт
оигпаме пāсныл 70 тал
тōвлы. Ты кастыл вете-
раныт олнэ коланыл хот-
щēпитаңкве патавет.
Югра мāt пуссын акввёт
1 сōтыра 800 хōнтлам
хōтпа ты вāрмалъ щир-
ыл нётуңкве эри. Тән
коланыл 2015 тал яңк
нātнэ ётпос мус тах
щēпитавет.

Николай МЕРОВ

Мошцаг хультум мирыт хон мāt атхатыгласыт



Сўкыр этпост США мāt Нью-Йорк ўст ООН штаб-квартират мā яны-тыл олнэ соссан мāхум яныг сапрāнин акван-атхатыгласыт. Россия мāныл мāхум тув ос ялсыт. Россия соссан мāхум Ассоциацияныл, ос «Союз общин» нампa организацияныл ос финно-угрыт халт делегатыт пēриялвёсыт.

Мāн округувныл Генеральный Бухтин, губернатор вāнын хум, ос Александр Новьюхов, «Югра лылыеп» организация кўщай хум, яныг сапрāнин ялсыг. Александр Вячеславович лāвыс, тāн тот кит хотал сис рўпитасыт, соссан мāхум тārвитың вāрмаляныл урыл потыртасыт. 2007 талт ты мирыт мāгсыл ООН яныг нэпак пирмайтасыт, руц лātңыл «Декларация по правам коренных народов мира» намаим олы. Тотхансым олы, соссан мāхум тāнки пēs йис мāt вос олэгытос тāнки пēs вāрмаляныл, лātңаныл элалъ вос тотыяныл. Ты мāныл мāхум нэмхотьютын хот-нйвлуңке ат вәрмавет. Ань мā яны-

тыл тōва государстват ты нэпак щирыл рўпитэгыт ос мōтаныт таве пирмайтāңке шар ат кāсашегыт.

Мā янытыл олнэ государстват мошцаг хультум мирыт тārвитың вāрмаляныл ул вос ёрув-лыяныл ос тāн акваг вос нēтавет, 2004 талт ООН нэпак пирмайтавес, руц лātңыл «Второе десятилетие коренных народов мира» намаим олыс. Ты лов тāl сис манхурип рўпата вārвес, яныг сапрāнит мāхум ос потыртасыт.

ООН мāt Россияныл Виталий Чуркин акваг рўпиты. Россияныл ёх-талам мāхум ты кўщай ёт хонтхатыгласыт ос тāнки тēланыл урыл тавен потыртасыт.

Людмила АЛГАДЬЕВА

Мā-витув ўргалан вārмалит

Сергей Пикун, мā-вит ўргалан службат кўщай хум, ляххал тотнэ хотпат мāгыс тамле лātың лāвыс. Тав округ янытыл мā-вит ос вōруй уралътан тēлат урыл потыртас.

Ань мā-витув кāсың тāl арген пāңктуңке патвес. Сергей Владимирович лāвыс: «2013 тāl сис мāн палтув мāхум 246 полыщ тотнэ нэпак кēтыгласыт. Тыгыл 45% савиткем мāхум тāнки хот-āti порс мори пāхвтэгыт. Ты тāl онтолов этпос сис 244 полыщ тотнэ лātңыл кētвесў. Тамле тēлат мāн пуссын уралътыяныл. Люль нак вārнэ рўпитан колыт

манос хотпат шрафыл пиныяныл.

Молты талт 3 сōтыра 578 рўпитан колыт порс вārнэ щирыл тāра-паттувёсыт. Тувыл 3 сōтыра 16 тēлат палт мāн олн ойтнэ нэпак хасылтасў. Та щирыл савсыр организацияныл 50 млн. солкōви атуңке эрыс.

Ань тиг мус 2 сōтыра 947 тēлат мāгыс мāн 44 млн. 127 сōтыра солкōви атсў. Мōтаныт иң ат

ойтхатасыт. Тōванакт олныт сут тāра выганў. Мā-вōй нōх-винэ компаният халт «Роснефть» ос тав ётэ рўпитан «РН-Юганскнефтегаз» нампa колыг тēн мā-витув сака пāңктыгтēн.

Яныг ўсың ос пāvлың мāt мāхум порс-анят мори вārегыт. Тамле люль накыт тōванакт ЖКХ рўпитан колыт ос тāра-паттавет. 2013 талт савсыр мātт 338 тамле порс-анят хонтвёсыт, тыгыл 309 хот-щēпитавёсыт. Ты тāl 135 мā хот-щēпитаңке алымавёсыт.

Айнэ вит ос уралъта-вес. Тот 98% уралътым мāt витэт сав витхурип кērщāлыг хонтвес. Пор-

сыт мори хуигланэныл мāгыс, тувыл мā-вōй ос газ хот-āti сōссантан щирыл ят остўрыт сака пāңктаве. Тувыл тōва ЖКХ мāt, янгыщ Нефте-юганск ос Нягань ўсыгт, вит сыстамтан утыт шар пēsыг ёмтсыт. Мā-вōй тотнэ турпат ос пēsыт.

Тāн ос мā сака пāңктыяныл. Тамле люль вārмалит пуссын витн тēлыгтахтэгыт ос витув аюңке ат хойхаты, таве сав щēs сыстамтаңке эри.

Ань ты вārмалит акваг уралътым оныщавет.

**Тамара
МЕРОВА**

КҮЩАИТ РҮПАТАНЫЛ

Няврамыт округувт вос ханищтахтэгыт

Югорский университет яныг кұщайт
Татьяна Дмитриевна Карминская
рүпиты. Ты этпос тав ляххал хаснэ махумн
вәрнэ рүпатаныл ос ЮГУ урыл потыртас.

Ты этпост ЮГУ рүпитанэтэ пәсыл 13 тәлэ төвлыс. Ты ханищтан кол рүпитаңкв овылтахтаме порат Ханты-Мансийск үст рүпитан сәвсыр институтыт пуссын тув тотвэсыт.

Ань тот няврамыт ханищтым сәв хөтпа рүпитэгыт, тән халаныл савыңпәлэ пуссын учёный нам оныщэгыт, сәв хөтпа наука «доктор» нам оныщэгыт, сәв хөтпа «кандидатыг» ёмтсыт. Кос хөт няврамыт ханищтан вәрмалъ ань йильпи щирыл вәрәве. ЮГУт

касың ханищтан хөтпа такви янас программа хансы. Ос ты элыпәлт тән план-нәпакыл майлувэсыт, тот хансым олыс - няврамыт хумус ханищтахтэгыт, манхурип лекция тән мағсыланыл ловиньтаңкв эри.

Татьяна Карминская лавыс, ты тал тән университетаныл нупыл тит колыг хасвэсыг - ты Нижневартковский нефтяной техникум ос Нефтеюганский индустриальный колледж. Ань тән ма-вөй нөх-винэ мат рүпитан кұщайтн лававет, манхурип спе-

циальность щирыл няврамыт ханищтахтэгыт, манхурип специалист ат төвылхаты. Тәра-патыс, бурильщикыг рүпитан махум сака мощца, сәвнув хөтпа ты рүпатан ханищтахтэгыт тах патавет.

Тувыл элалъ кұщайт нэ потыртас, ты 2014 тәлт манах хөтпа университетн ханищтахтэгыт ёхтыс. Туи порат **3 сөтыра 709** хөтпа заявление хассыт, ос та махумныл **1 сөтыра 417** хөтпа тот хультуптавэсыт: **908** хөтпа очный щирыл ханищтахтэгыт, **509** хөтпа – заочно. Ты агит-пыгыт халт төват ханищтахтын эныл мағыс оln ойтуңкв патэгыт.

Кәсың тәл сәв-

нув няврам тув ханищтахтэгыт ёхты. Тән нила тәлт тот ханищтавет. Төват касасэгыт те, иң тит тәл элалъ тах ханищтахтэгыт, ты рүпата руш ләтңыл тох ләваве – магистратура. Тот хөтпа мах мұсхал рүпатан ханищтаве. ЮГУ аслам хөтпат рүпата хөнтүңкв ос нэтавет. Югорский университет аслам 250 хөтпа «Ханты-Мансийский банкыт» ань рүпитэгыт.

Ты тәл округувныл сәвсыр ұсытныл, пәвлытныл 455 хөтпа тув ханищтахтэгыт ёхтыс, Ханты-Мансийск ұсныл - 225 хөтпа. Мөт мир пуссын сәвсыр мөт элы маңыл ёхтысыт.

Валентина
ВАСИЛЬЕВА

Йильпи ханищтан нәпакыт вос хансавет

Школат соссаң няврамыт ханищтан
хөтпат Ханты-Мансийск ұсн акван-
атыглавэсыт. Тән наука ос образование де-
партамент ос Ас-угорский институт пәлыл тув
вөвиньтәлвэсыт. Махум няврамыт ханищтан
нәпакыт урыл потыртасыт.

Ты вәрмалъ урыл Майя Ефимовна Макарова, региональный образование институт рүпитан нэ, тох лавыс:

– Мәнасс школат рүпитан соссан хөтпат ләтың кетсыт. Тән школат ханты, маңьши ос ёрн ләтың ханищтан щёсыт мағыс оln ныл ойтуңкве мощэрт ёл ты пөйлттавет. Ты вәрмалитань хосатхансым нәпаканув мағыс ёмтсыт. Ань образование палт сәкконьт мөт щирыл щёпитавэсыт. Федеральный государственный образовательный стандарт, руш щирыл-ФГОС, хансым олы, няврамыт ат тәл ювле-хультум порат хансым нәпакыт

щирыл ханищтахтэгыт вәрмавет. Ты элыпәлт таратым нәпакыт пуссын пёсыг ловиньтавет. Ханищтан нәпакыт пуссын уралтавэсыт ос ётыл тән акв реестрын хасвэсыт. Туп тув хансым нәпакытыл няврамыт школат ханищтахтэгыт рөви.

Соссаң ләтңанув ханищтан нәпакыт, вәим, тув ат хасвэсыт. Мән нәпаканув пуссын хус манос вәт арыгкем тәл ювле хультум порат щёпитәлвэсыт. Йильпи нәпакыт мән ат оныщэв. Ань округувт образование тармыл оlnэ кұщайт ат вәганьыл, хумус соссаң ләтңыт ханищтан хөтпатн элалъ рүпитаңкве эри. Ман-



М.Е. Макарова

рыг мән тамле нәпак ат оныщэв, хөтты хөтпаньыл ань китыглаңкве, мән ос ат вәглүв.

Руш ләтың ос мөт предметыт ханищтан нәпакыт хаснэ мағыс сәвсыр институтыт рүпитэгыт. Тот сәв учёный хөтпат эрнэ щирыл нәпакыт хансыяныл. Щәнь ләтңыт ханищтан нәпакыт кәсың республика ос округ танки щёпитаңкве лаввэсыт.

Округувт ты рүпата вәруңкве нәмхотыют ат вуйхатас. Мән институтувт өвләт лаборатория олыс, няврамыт

хумус ханищтахтэгыт эрэгыт, тот мән ханищтан хөтпат хультыглаңкве туп вөрмысанүв. Нәпакыт маңки ат хассүв. Щәнь ләтың ханищтан нәпакыт щирыл хультыглан потрыт вәрыгласүв.

Ётыл нәпакыт хансуңкве Ас-угорский институт махум лаввэсыт. Тән ловиньтан нәпакыт таратасыт кос, ос ань няврамыт мағыс эрнэ букварит атимыт. Ты нәпакыт пуссын «типовой» нампә программа щирыл вәравет, ос щәнь ләтың ханищтан программа нәмхотыют щёпитаңкве ат вуйхаты.

Мән ань ты вәрмалит тәра-паттын мағыс ханищтан хөтпат ёт акван-хөнтхатыгласүв. Акван-нөтхатым йильпи нәпакыт хаснэ урыл потыртахтасүв.

Тамара
МЕРОВА

Люль нак тара-паттувес

Ты этпост госнаркоконтроль тэлат тармыл рүпитан кұщай Алексей Якименко ляххал тотнэ хөтпат ёт хөнтхатыглас. Тав Сургут үс ос районуытыт осн-нэглум люль вәрмалы өвылтыт потыртас.

Тот акв сат сыс 200 савитхөтпат пұльницан тотыглавёсыт. Ты элы-палт тән ватал таври ёв-тыгламыт ос тувыл хох-саг хартнэныл юи-палт савалаңкве патсыт. Нё-лолов хөтпат атимыг ёмтыс. Ты махум пуссын наркотик хосыт өлэгыт. 68 элумхөлас пұльницат хулытсыт, мотаныт элалы пусмалтахтұңкве ат кәсашасыт, юв ми-намыт.

Округувт наркокон-троль тэлат палт рүпитан хөтпат губернатор ос мот кұщайт ёт акван-хөнтхатыгласыт ос тән ётаныл акван-нётхатым ты тэлат уральтаңкве потыртахтасыт. Поли-цият рүпитан хөтпат ты

люль нак вәрнэ хөтпат савсыр мат этэ-хөталэ уральтым өшсаныл, ос люль тәрпи тыналан мат тара-паттысаныл. Мот-мот мат тән нар-котикты тыналан ат хөтпа пувсыт. Ты хөтпат ишхыпың ут хосыт ма-нос щёпт өшнэ телефон щирыл потыртахтым махумн ты люль тәрпит тыналэгыт. Наркотик хартнэ хөтпа лававе, хоты мән тавён олн пинуңкве эри, ос тувыл мот мат люль тәрпил пи-наве, тав ань ханышув-лым олы, тувыл аквагта выганэ. Сургутыт матах-мат тамле ма хөнтвес, тән үс картан пөслым өлнэныл ос туп эрнэ хөтпатн тән вавет. Ты ат

хөтпа магыс «уголовное дело» нэпакыт хасвёсыт ос пуссын тән вәрнэ тэланыл ань уральтаңкв патавет.

Та юи-палт Сургут үст өсnilа хөтпа пуввес. Ты хум хөтпат янас гараж өшмыт ос тот тұлмахыл люль тәрпит вәрмыт. Ту-выл тәнки ос савсыр мән пинсаныл. Тән мот үсың мәныл олн сәлуңкве тув ёхтумыт. Хоты хөтпат ёт тән рүпитэгыт, ань элалы тара-паттаве.

Люль тәрпи вәрнэ магыс сыресыр лүпатат ос пұңкманос мот агмыт пусмалтан тәрпит ап-текат ёвтиңныл. Тувыл тыит таврииг вәрияныл, ос ацетон ман мот сыре-сыруттув пинэгыт, люль вит ёт мощ тэлыгты-яныл, тослыяныл ос нарко-манхөтпатын та тыналыяныл. Маныр-сырман таври вәраве, манос олы. Акван-

тэлыгтан утыт пуссын янас наркотикыг кос ат ловиньтахтэгыт. Тувыл сунсән, хумус махум пұңканыл тэлыгтавет ос сыманыл-майтаныл ётыл агмыңыг, сайттәл патэгыт.

Ань тамле пилыщман вәрмалит ләшмарт ёл-пөилттаңкве патавет тах. Сыресыр тәрпит ёмшакв уральтавет ос товат туп ләккарытн хасылтаңкв патавет. Тән ань «психоактивный вещество» ат таратан нэпакн хансым ат өлэгыт, таи магыс гаражт хөнтым сав утыт нарко-тигыт ат ловиньтавет. Тот таврииг вәрим туп матахмат хұрыгсовыт щёпитым өлсыт. Тувыл элалы хотыл вәглүв, ма-нах хөтпа палт тән кәтн патэгыт ос ты хосыт иң манах хөтпа порсы.

Тамара МЕРОВА

Пальтәл махум касыланыл

Мощ мөлаалнув Ханты-Ман-сийск үст ат хұлнэ махум 2015 тәлт ёсал каснэ касыланыл щирыл пресс-конференция өлыс.

Та касыл руш ләтңыл «XXVIII Сурдлимпийские игры» лававе. Ляххал тотнэ махум ёт Эдуард Владимирович Исаков потыртаңкв ёх-талас. Тав «Центр адап-тации спорта Югры» кас-нэ кол тармыл кұщайт рүпиты.

Өвлёт Эдуард Влади-мирович лавыс:

- Тамле касыл мән Россия мәвт шар өвыл щёс ты вәраве. Ат хұлнэ махум тыт ёмашакв өлнэныл магыс сав тәла йильпииг эрыс щёпитаңкв. Ты Сурд-лимпийские щирыл

нила касыл вәраве. Ёсал хайтұңкв ос «сноубор-дыл» касуңкв патэгыт. Ты касылт махум акв пәхвың ёсан тит ләгыл акв юи-палт тұштым щирыл сып пұңкныл ёл тахаттым касэгыт. Та коньпал иң хоккей ос «кёрлинг» нампә ёнгил пальтәл махум хала-нылт касуңкв патэгыт. Сыпныл тахаттан ка-сыл Магнитогорск үс пөхат «ММК-Курорт» нампә ұшлахтын мат каснэ мананыл ёмты. Мән округувт өлнэ сы-панув әти тамле карсыт ос пәхвыңыт, мансавит-

тем тәнаньылн эри.

Ляххал тотнэ хөтпат титыглахтасыт:

- Мансавитхөн мәныл ос манах каснэ махум тыг ёхты? Тувыл каснэ мирхәлт округув магыс мансавитхөтпа касуңкв паты?

- Мәянытыл вәтнупыл хөт элы хон мәныл мир тыг ёхтұңкв ләвхатсыт. Акв ёт пуссын 450 кас-нэ хөтпа ёхты. Мән округув магыс хөт хөтпа касуңкв паты. Тән хала-нылтат хотпа ёсал хәйты, акв әги ос сып пұңкныл тахаттым касы. Ань тән пуссын Германия хон мат, Оберхот үс пөхат тыяныг касылт касуңкве щёпитахтэгыт.

- Хон мәныл ёхталан ат хұлнэ махум ос мән

мәвит өлнэ ат хұлнэ хөтпат халанылт потра-ныл хумус торгамтыя-ныл? Ты касыл нән ма-ныр вәрегын ос хотыот хаништәгын?

- Соль, пальтәл махум халанылт ат хашхатэгыт. Ты касыл мән ань хұрумсәт арыг-тем нётмил вәрнэ хөтпа хаништәв. Савыңпәлэ пальтәл махум ёт рүпитан щирыл сту-дентыг өлнэ мәныләт махум суптәл потрын хаништахтэгыт. Тән халанылт ёмшакв тит ләтңыл супнәлмтәл потыртан атхойполов хөтпа олы. Ты коньпал иңтәнихон мәныл ёхта-лан супнәлмтәл потыр-тан махманыл нётуңкв патэгыт. Ам номсәгум, пальтәл хөтпат ёт потрув акв мән ат ноппи.

Александр ВЬЮТКИН

Мән Ягрим ос Аңъя павлыгн ялсұв

Ты этпост округ Дума депутат нә Татьяна Гоголева, тав ётә рұпитан ағи Оксана Рыжкова ос Светлана Динисламова, Ас-угорский институт рұпитан нә, Ягрим павылы ос Аңъя павылы рұпата щирыл ялсыт. Тән тот соссаң махум ёт хонтхатыгласыт. Ам тән ётаныл тув ос ялсум. Нән ты урыл элалъ ловиньтән.

Ягримн ёхтумув порат, тара соссаң махманув акван-атсанұв. Татьяна Степановна өвлёт так-ви рұпататэ урыл потыртас. Сартын Пётр Шешкин ойка номылматыглан кастыл Лопмус павылыт нәпак ловиньтан вәрмалъ щёпиталвес. Тув сав маньщи хотпат мүйлуңке ёхталасыт. Та порат пöслым хурит суссылтавёсыт. Тувыл мот савсыр павылыт өлнэ маньщи хотпат хурияныл суссылтавёсыт. Төва хотпат танкинаныл касаласаныл. Махумн ты вәрмалъ сака мұстыс. Тувыл хұрум яныгпала мащтыр экват округ Ассамблея палылы янытлан нәпакыл майвёсыт. Ты Валентина Дорофеевна Саратина, Хорыңпавылыныл өлнэ эква, тав ань ағитэ ос ағи нявраманэ ёт Ягрим павылыт олы. Тувыл Тамара Семёновна Мезенцева, Аңъя павылыныл өлнэ эква, тав ань ос Ягримт олы. Хұрмит эква Марина



Вынгилева. Ты нә хотпат юнсхатнэныл ос саквыл хорамыт вәрнэныл мағыс янытлавёсыт.

«Концертно-выставочный» колт мащтыр махманув юнтум ос сакныл сагум пормасаныл суссылтан мағыс щёпитавёсыт. Савыңпалэ Валентина Дорофеевна, Тамара Семёновна ос Елизавета Селивёрстовна Мерзлякова вәрум нётнэ пормасаныл тот өлэгыт. Мирпұмшалахтуңке тув аква ёхталэгыт.



Тувыл Светлана Динисламова потыртас. Тав ань няврамыт мағыс журнал тараты. Тән уранылт савсыр пұмаш потырт хансы. Ты коньпал Светлана Селивёрстовна нәпакыт ос стихотвореният хансы. Соссаң махманув яныг щагтыл таве хұнтлысыт. Тав маньщи ос руц латңылетат емас стихотвореният ловиньтас. Тувыл астама юи-палт касың хотпан такви хансум нәпаканэмүйлуптасанэ.

Мотыт хотал ос Аңъя павылы мотор-хапыл минасұв. Тот өлнэ соссаң махманув клуб колт акван-атыгласанұв. Ос хурит суссылтасұв ос өлупса вәрмалит урыл потыртасұв. Төва хотпат кұчай нән нётмил вовнэ мағыс нәпак хассыт. Ань павылыт рұпата атим.

Махум хумус вөрмёгыт, тох та өлантэгыт. Депутат нә Татьяна Гоголева ты нәпакыт пуссын ёт-висанэ. Ань тах эрың махум мощ нётмилыл вәравет.

Махум рұпата ат өщнэныл мағыс төва хотпат Ягримн өлуңке минасыт. Павылы нас ўщлахтын мағыс ёхталэгыт. Тэпкан винэ порат ос хұл алышдан порат тув ёхталэгыт. Павылыт хультум махум щищкурек ос ўйхул янмалтэгыт. Хұл миннэ порат ос нялк, сорых пувегыт. Алышдан хұланыл Ягрим павылы рыбучастокн тыналыяныл. Таил ты өлэгыт. Ётылнув тот өлнэ махманув урыл ос янас тах хансэгум.



Аңъя павылыт

Николай МЕРОВ

Ўльпа шахыл

Ўльпа – шуниң ййв. Ўльпа талныл, ўльпа оңхныл тэрпи варава, пақвсамытныл вой пащиртава. Ййвёныл хәп, ёса варава. Пақв ке тёлы, шуниң таквсыг ләвава.

Хәльүс район Хулюмсунт павыл школа ависунт элы-пәлт ўльпа шахыл яныгми. Хурмитклассыт ханищтахтын нйврамыт овыл тал ханищтахтаманыл порат школа элы-пәлн мань ўльпа пыгрищит ўнттыгласыт.

Мощ мёлалнуб, акв хотты хотал, пыгрищит 11 классыт ханищтахтын агирищит ёт ўнттум ўльпаныл сунсуңкв ялсыт. Ўльпаныл уральтасаныл, ловиньтасаныл,

ййваныл пөхыт мәтэ мощхот-хилащласаныл.

Ёты хотал классанылт агирищаныл лялт потыртасыт. Тән ань вәганыл, ўльпа ййв сака ләщал яныгми, пақвын ос молях ат тәлава. Янмалтан мәгыс ўнттым ййв вәтихал уральтаңкв эри.

Овылклассытханищтахтын нйврамыт ос кит хотал мус мә-вит урыл потыртавёсыт. Хумыс ўльпа яныгми, тәланэ манхури-



пат, маныр оңтас ўльпа ййвныл ёмты, пуссын ты урыл 11 классыт ханищтахтын аги Виктория Лаверина нйврамытн потыртас. Тувыл тәнаныл мань ўльпа пыгрищитыл мисанэ.

Урокыт холам юи-

пәлт биология урокыт ханищтан нә Т.А. Головина ёт, ханищтан нәныл Н.В. Ожгибесова ёт ос 11 классыт ханищтахтын агит ёт нйврамыт ййваныл мән ўнттысаныл. Ўнттум ййваныл иң сака мәнит. Тыт рүпитам махум пуссын таңхёгыт, махум ты мань ўльпарищаныл яныг ўльпаг вос яныгмасыт.

Тамле ханищтапыт пуңкын хосан пухтёгыт. Касың нйврам «Кедровая школа» нампа удостоверениел мүйлуптавес ос ўльпа пақкыл майвес.

Ань школа элы-пәлт вәт нупыл онтолов ўльпа яныгми.



Анна
АЛГАДЬЕВА

Иныг ййвың, лям ййвың павыл

Таквсы кит ўшлахтын хоталыг сыс школат ханищтахтын маныщи нйврамыт, школат рўпитан кит ханищтан нэг ос това павлын махум Меңквъя павылы ялсыт.

Меңквъя павыл ват нупыл ат вёрыстат Хулюмсунт павылныл лонхалы олы. Ты павыл павлын махманэн намётыл ат лававе. Пёс олум махманэн Иныг ййвың, лям ййвың павлыг лаввес. Ань олнэ павлын махманэн, нас, та павлыг лававе. Пёх хотпан тай Меңквъя павлыг лавуңкв рөви.

Тыг ялнэ номт хосат тагыл олыс. Биология ос химия урокыт ханищтан нэ Т.А. Головина таквс палытыл щёпитахтас, ханищтан нйвраманэ ёт сартын тагыл ты урыл потыртас. Сака таңхыс ялуңкв. Наскасыг хунь лавёгыт, хунь номтын-тыл сака ке тақыщ матыр таңхёгын, вәрмалы та щырыл та паты. Ам маныщи латың ханищтан нэг школат олэгум, ам осты махум ёт ялсум.

Хоса щёпитахтасуь,

аквматэрт ты астысуь. Миннэ палаг патсуь, ат хәп ёмтыс. Миркол кўчайнэв О.В. Баранова ат вёритас, хотыт хәпыл такви ёрыл ос мән ётув ялыс. Янге-мәнётыл пуссынаквёт ватнупыл нила элумхолас.

Яласамув сыс ёмашакв рўпитасуь, аквты-мус ўшлахтасуь. Павыл коны-пәлт ёмыгтасуь, вөрө манхурип - тара паттыслуь. Хумыс нир тыт поталы, сэныг, сөс, хәль пўнат яныгми, суссуь. Хара павылкан хосыт нас ёмыгтасуь. Галина Константиновна Алгадьева щар яныг хотпаг мән халувт олыс. Тав уш хум вәрме порат ойкатэ Илья Никитич Алгадьева ёт ос оныпе Мария Васильевна Алгадьева ётты павылт олыс.

Нәлми ватат пёс кол ўнлы. Галина Константиновна ләви: «Та пёс



кол сыспәлн минуңкв нэ хотпан ат рөви. Та кол сәмт хуньт пёс порат Миснэ колъёр олум. Павыл олымётэ порат мис-лув ошсыт, ўйхул тув ке мины, тот ке ёмыгты, тоңханэ эл-нәлттавет.» Тох ты, та кол сыс-пәлэвуянтахты. Вәтәл мәт мори ёмуңкв ат рөви.

Мән ялмувт вит яныг олыс, улпыл таимәгыс пыгрищит такос хўл нясласыт, нәматыр ат пувсыт. Агирищит ос тән пәлтыланыл юршигтахтыглэгыт кос. Мәтар хилсыт, такос нясласыт. Исмитув ат

тёлыглас. Хум хотпат хўлп ўнтталасыт, акв хулюмхул муңкпыг туп пёрыглалас. Галина Константиновна та хўлыл хумыс ёхыл вәрәве, сус-сылтас. Агит иныг, па-щар, лям вәтсыт. Пыгри-щит ўльйив халытасыт.

Тәнүт әрашт пәйтсүь, акв яныг пәсаныл кон тәпъяласуь.

Акв эт туп хўлсуь. Кит кол мус олсуь. Га-лина Константиновна колэ мән, колың махум тәнкитотхўлсыт. Семён Ильич Алгадьева колэ яныг, сәв пәл оныщи. Ёх-талам махум савыңпәлэ пуссын тот хўлсыт, пәлн ат төвлувёсыт, кол-канн нортгалахтыгла-сыт. Йтипәлаг савсыр мөйтыт мөйтсүь.

Такем ёмшакв яласасуь, нйврамытн сака мустыс. Кытыг-лахтёгыт, хунь ос аквтох аквёт хотталы минэв? Сартын лавхатуңкв ат патсуь, мәлтыпыгёмты, ушосномсахтэв. Яганув-опарищанув хуньт ворт яныгмәласыт, вөрыл ха-нищтахтыгласыт. Ман-хурип тәл, таквс, хотал ёмты, сартын вәсаныл. Мән ос акв ты вәрмалы койгалым, вөр ханищ-тым кос яласэв.

Анна
АНЯРМОВА



Мāньщи нэ щемьятэ ёт яныгмам мātэн олуңкве ёхтыс

Людмила Ивановна Калиниченко, такви
ёпарищ наме Кугина, щемьятэ ёт Украинат
Донецкий область Краснолиманский район
Коровий Яр пāвилт 34 тāl олыс. Вёртур этпост
мāньщи нэ такви колтāглэ ёт яныгмам мātэн
олуңкве ёхтыс.

Тав лāвыс: «Ам Хāльүс район Кульпас пāвилт самын патсум, тот яныгмасум. Школа āстламум юипāлт Тюмень үсн элаль ханищтахтүңкве пōйтсум, ойкам ёт Украина мāн олуңкве та минасум. Мён кит пыг ос āги янмалтасмён.

Олнэмāвтхонтланнак ат ке овылтахтас, элаль тот олнувүв. Ам тасāвит тāl хаштāl мāt олымам, тув ханьщувласум. Тот олнэ колув, үйхуланув пуссын хультуптасанүв. Мāн хунь вāслүв, тох ёмты, ам нāвраманум яныгмам мāнанылн тамле пилыщмаң нак ёхты. Овлэт номсысүв, война ат овылтахты, мāн коланув нуми-пāлт сāvсыр истребитель наппа товлыңхāпыт яласаңкве ат патэгыт ос коланув нупыл бомбат пāхвтуңкве ат патает. Тот олымам акваг нāвраманум мāгсыл пилсүм. Украинат хунь тамле хонтланвāрмалит овылтахтасыт, ойкам, пыгагум ос āгим Россиян олуңкве минуңкве акваг вōвсанум.

Тот пилым, түйтхатим олсүв. Ыти шар ат хуясум, акваг люньщим номсысум, хумус элаль олуңкве патэв. Тāнтыгминуңкве

шар ат кāсащасыт, пāвлут хунь истребитель товлыңхāпыт акваг яласаңкве патсыт, туп тōнт тыг минуңкве щёпитахтасыт.

Нāвраманум ос апыгрищанум ёт вёртур этпос 12 щислат пāвилныл Россия нупыл минмыгтасүв. Олныл Россия границатэ мус ёхтуңкве туп тōвлувесүв. Матёмас Россият рутанум олэгыт, Светлана Динисламова (Садомина) мāнавн лēңх олн кетыс. Вёртур этпос 20 щислат Сургут үсн ушта ёхтысүв. Ойкам Украинат пенсиятэ үрим хультыс, туп сүкыр этпос 20 щислат тыг ёхтыс.

Сургут үсн хунь ёхтысүв, тāра УФСн минасүв, тот пуссын эрнэ нэпакыл вāрвесүв. Страховой полисыл пуссын молях майвесүв, пүльницан лēккарыт палт уральтахтүңкве кётвесүв. Виталя пыгум хōпсытэ пōслувес, тувыл пүльницан пинвес. Тав 2011 тāлт хōпсытэ āгмыңыг ёмтыс, тōнт пүльницатсака хоса пусмалтавес. Лēккарытн тōнт лāvвес, пүльницан уральтахтүңкве вāтихал вос ёхталы. Сургут үст хōпсытэ пōслувес, лēккарыт тот матыр оста кāсаласыт. Пыгум мāгсыл ань таком сымум āгмың. Ань Виталям Сургут үс пүльницат пусмалтахты, нāвраманум Ханты-Мансийск үст



Света Динисламова палт олэгыт.

Тыт Украина мāныл ёхтум мирыт ань ёмашакв нётавет. Мāн мирн нётнэ центрин ялсүв, тот нāвраманув мāснутыл майвёсыт. Кит щёс ос тэнутыл майлувесүв. Тыи мāгсыл ам яныг пүмашипа лāтың лāvегум.

Мён ойкамёнтыл Кульпасн олуңкве ань минымён, Рая эщум колэт олуңкве патымён. Тав ань Хāльүсн вāнтлас, пыге ос Урай үсн рүпитаңкве минас, овлэт тэн колэнт олуңкве патымён. Агимён хұрум нāвраманэ ёт-выганум, ам ётум тув минэгыт. Пыгагмён тыт Ханты-Мансийск үст хультэ. Александр яныг пыгум водителиг ханищтахтас, Виталям ос трактористыг рүпитас. Юля āгим ос маснут юнтым рүпитас. Вāпсум Александр ос трактористыг ханищтахтас. Мāн тыт «центр занятости» колн ялсүв, нэпаканув тув мисанув. Алёна манюм ос маснут юнтым рүпитас. Виталий экватэ ос āгитэ Украинат Краснолиманск үст олэг, тэн тав ётэ киттыг-минасыг. Ху-

мустэн тот олэг, ты урыл акваг номсэгум. Ты элыпалт тав ётэ телефон хосыт потыртасум, лāвыс, пилым, түйтыглахтым олэгыт. Мāн ётув тыг минуңкве ат тахмаяс, тот ома тэ палт хультыс. Внучкам тыг ёт - виңкве ат мистэ.

Украинан ювле мāн воссыг ат минэв, тыг олмыгтэв. Хунь мāхум Украинат хонтлаңкве пōйтэгыт, колув уральтаңкве туп ялэв. Нāвраманум ос лāvегыт, тув туп рутаныл палт мүйлуңкве ялантаңкве патэгыт.

1997 тāлт мāн украинский наmnэпакыл майвесүв. Та порат ам ойкам Россиян олуңкве вōвыгласлум. Ам мāньщииг олэгум, тыт самын патсум, тыт яныгмасум, ань үрхатэгум, тыт олнэм мāгсыл эрнэ нэпакытыл вос вāравем. Ты урыл хунь номсэгум, алаты люньщегум. Туп ань торгамтаслум, ты гражданство урыл тōнт номсахтүңкве эрыс. Ань мāн «статус временно-го убежища» нэпакыл майвесүв, Россия гражданствал мōтыт тāлт тах ущ вāравев.

Ам Татьяна Гоголева ос Надежда Алексеева, округ Дума депутат нэгн, Еремей Айпин, соссаң мāхум Ассамблеят кұщай хумн яныг пүмашипа лāтың лāvегум. Тāн мāнавн ёмашакв нётсыт. Людмила Алфёрован ос яныг пүмашипа лāтың кётэгум. Ты нэ Геннадий Бухтин, губернатор вāңын хум, палт нётмил вāрнэ нэг рүпиты. Тав мāнавн ос ёмашакв нётсыт».

**Людмила
ТАСМАНОВА**

Тит щань латың ванэ хотпа



Клавдия Васильевна Койнова Хальүст ҕы, тав аҕи ӕпарищ наме щирыл Рочева. Няхщамвӕль павылт ӕлыс, тот ханищтахтас, яныгмас. Тувыл тав Украина мӕн вантлыс, тот хус арыгтем тӕл ӕлыс.

Хальүст хӕнтхатыгламумӕн порат моц потыртасмӕн, Клавдия Васильевна рутанӕ ос такви урӕтыл тох лӕвыс.

- Ам Няхщамвӕльт самын патсум. Омав Федосья Дани-

ловна Анемгурова ӕлыс, ащув Василий Иовлевич Рочев, саран хум. Мӕн мӕнӕтагыл тит лӕтӕыл потыртасув, мӕнӕщи ос саран лӕтӕыл. Ханищтахтуӕкв ӕвылтахамув порат руц лӕтӕыл потыртаӕкв щар ат хӕссув.

Ащӕйкам Данил Васильевич Анемгуров Хӕнӕлсам павылныл ӕлыс, ты павыл ӕнлум мӕт ань туп акв-тит кол хультыс. Анӕквкам Анастасия Ивановна Няхлаӕ павылныл ӕлыс. Тӕн ат няврам ӕщсыг, нила аҕи - Федосья, Анна, Ольга ос Дарья, ос акв пыг - Петр. Яныг аҕитӕн Федосья - ты мӕн омав.

Тӕн сӕлы ӕщсыг, сӕлы ӕрим яласасыг. Хӕнт ӕлы-пӕлт 1937 тӕлт ащӕйкам ос хотталъ тотвес, лов тӕлминас, 1947 тӕлт ювӕхтыс. Ты лов тӕл сыс анӕквкам нявраманӕ ӕт тактӕт ӕлыс, тӕнти хотмус сӕлы ӕрим яласасыт.

Омав атяв ӕт 1941 тӕлт акванминасыг, омав тӕнт 18 тӕлӕ уц тӕвлыс. Атяв войнан ат вуйвес, сӕлы ӕруӕкв хультуптавес, аӕщитӕ тув тотвес. Мӕн нӕлолов няврам самын патсув, йигрищув тӕлӕ ат тӕвлыс, атимыг ӕмтыс. Сӕт няврам хультсув. Школан миннӕв



Данил Тасманов (Халпавыл),
Яков Рочев ос Василий Рочев, 1958 тӕл

мус мӕн омагувн-ӕтягувн сӕлыӕн колт тотыглавесув.

Мӕн иӕ мӕниг ӕлмув порат ома тӕл хультсув, мӕнтирот ӕлсув, мӕнти яныгмасув. Атяв сӕлы ӕрим нӕрт яласас. Туи порат павылт ӕлсув, пил вӕтсув, лӕхыс атсув. Анӕквкам-ащӕйкамн, Дарья аквувн нӕтвесув.

Школа асламум юи-пӕлт ам педучилищат ханищтахтасум. Моц рупитасум, щӕмьяӕ тагыл Украина мӕн минасув, тув ӕлмыгтасув. Хус арыгтем тӕл тот ӕлсув, ювле йигмыгтамув порат Щерки мӕн пыгум 20 тӕлӕ тӕвлыс. Ам Няхщамвӕль интернатт воспитателиг моц рупитасум, тувыл Ӕсн (пӕс мӕхманув Хальүс тох лӕвыгласаныл) вантлысум. Тит пӕс ӕргыт, мӕйтыт атнӕ колт рупитасум, тувыл культура центрит рупитаӕкв патсум.

Ань мӕн ты рупитан колув мӕт щирыл лӕвуӕкв патвес, ӕтделыг вӕрвес. Нила хӕтпа тыт рупитӕв, Р.П. Загородняя, Т.В. Тунгусова, ам ос колкан ловтнӕ нӕ. Тит пыгагум сас тыт ӕлӕг, рупитӕг. Щерки пыгум ань Коми республикат ӕлы, тот нӕ тотыс. Ӕкватӕ саран аҕи, яныг аҕитӕн саран лӕтӕыл потыртаӕкв сака ӕмашакв хӕсы.

Тамле ты потыр Клавдия Васильевна потыртас. Тӕванакт тав мӕн газетавн потрыт тӕтсӕлы, тав хансум потранӕ пӕмыщ ловиньтаӕкв. Мӕн тавӕн сӕв ӕмас лӕтыӕн тӕтӕв, Нӕй-Отыранӕн вос ӕргалаве, пустагыл вос ӕлы. Ӕлалъ потрыт мӕнавн вос хансы.



Няхщамвӕль павыл, 1958 тӕл

Архив кол 80 тәлэ тәвлыс

Ты этпос 6выл хәталәт округной Архив кол 80 тәлэ тәвлыс. Ты кастыл Югра янытыл архивытт рӯпитан маҳум Ханты-Мансийск ўсн в6виньтәлвәсыт ос янытлавәсыт.

1934 тәл мәнә таквс этпосәт Остяко-Вогульск ўст «Окружное Архивное бюро» вәрвес. Ты юи-пәлт Кондинский, Лярьякский, Октябрьский, Сургутский ос Хәльүс районт тамле колыт рӯпитаңкве 6вылтахтасыт. 1960-1970 тәлыт Нефтеюганск ос Урай ўсыт сәвсыр пәс нәпакыт архивн атуңкве патвәсыт. Ань кәсың районт манос яныг ўст 22 тамле кол 6лы. Округ янытыл 6лнә архив-колт 140 әлумхәлас рӯпиты, тот 809 сәтыра 906 сәвсыр әрнә-нәпакыт акван-атым 6ләгыт. 857 организация ань тәнки нәпаканыл тув кәтыяныл. Ты коныпалт тот 30 сәтыра 654 пәс хурит 6ләгыт.

Ты маҳум яныг рӯпата вәрәгыт, пәс әрнә нәпакыт, хурит акван-атсаныл ос акв мāt ўргалым 6ныщияныл. Тыщирыл мән пәс 6лупсав ат әрувлылүв. Хөнтлан нак әлы-пәлт тыт сака сәв маҳум наскәсыг порславәсыт. Тыпиыщмаң вәрмалит урыл архивыт 6лнә нәпакытт хөнтуңкве

рөви. Ань сәв маҳум тув ялантәгыт, рутаныл урыл хансум ләтың кинсәгыт.

Пенсиян миннә маҳум тәнки рӯпитам организацияныл нәпакыт 6с тот хөнтуңкве вәрмәгыт. Акв тәл сыс 75 сәтыра арыгкем әлумхәлас сәвсыр нәпакыт кинсым тув әхталы. Тот рӯпитан хөтпат сәв пәс нәпакын «Электронный архив Югры» нампә тәла палт хассаныл. Ты нәпакыт интернет хосыт ань ловиньтаңкве рөви. Архив тамле әрнә рӯпата мир магсыл та вәри.

Соссаң маҳум 6лупсаныл урыл сәвсыр пәс нәпакыт ос хурияныл архивыт ос акван-атим 6ләгыт. 80 тәл ювле хультум порат округувт янытыл колхозыт ос совхозыт рӯпитаңкве 6вылтахтасыт. Ань та колт сәв пәс нәпакыт 6ләгыт, хот хансым 6лы, хумус план магсыл мәнә щит, хантыт рӯпитасыт, манасәвит уйхул пувсыт, манасәвит пил вәтсыт. Тамле нәпакыт ань туп архивыт кәсалаңкве рөви.



Ялпың хөтал 6лме порат «Архивная служба. 80 лет вместе с Югрой» нампә суссылтап вәрыглавес. Ань маҳум хумус рӯпитәгыт ос пәс нәпакыт хумус ўргалым 6ныщәгыт, та урыл кина суссылтавес.

«Югра-Классик» нампә колт ос «История Югры в архивных документах» мөт суссылтап рӯпитас. Ты выставка сунсуңкве сәв маҳум әхталасыт. Тән нуланыл Людмила Сажаева, окружной Архивыт кӯцаиг 6лнә нә, лавыс: «Тыт мән округ янытыл 6лнә архивыт сәвсыр нәпакытос хуритакван-атсанүв. Тыт Югра мāv йис поратә ос маҳум пәс 6лупсаныл урыл ловиньтаңкве рөви. Това нәпакыт шар 6выл щәс суссылтыянув».

Ты юи-пәлт архивыт сәв тәл рӯпитан кәркам хөтпат кӯцаитн янытлавәсыт. Алексей Путин, губернатор вәңын хум, маҳум нупыл лавыс: «Нән нәпакыт акван-атим, сәв әрнә тәла варегын. Ань нән палтын пенсионный фондыл, мирн нәтнә департаментыл ос округувт 6лнә маҳум нәпаканыл кинсым архивн әхталәгыт. Ты рӯпата магсыл нәнәнн яныг пӯмащипа ләтың лавәв».

Борис Хохряков, округ Дума кӯщай хум, ос Василий Филипенко, Ханты-Мансийск ўст миркол кӯщай хум, сәв әмас, сымың ләтың лавсыг ос сәв тәл кәркамыг рӯпитан маҳум янытлан нәпакыл мисаныл.

Людмила ТЕТКИНА



Мāньщи хōтпаг потрēн



Клавдия Ефимовна Сайнахова Хāльүс рай-
кон Лōпмус пāвылт самын патыс. Куль-
пас пāвылт школа āстламе юи-пāлт тав Ханты-
Мансийск үсн фельдшер нēг ханищтахтуңкве
минас. Та ханищтап āстластэ, тувыл 1981 тāлт
Няхщамвōль пāвылн рупитаңкве кētвес.

Аквматнакт ам та пāвылнялсум, тав колэн шалтасум. Эква такви өлүпсатэ урыл āнумн мощь потыртас. Тōнт ойкатэ лылыңтагыл өлыс, наме Вячеслав Юрьевич. Ты тал тав āтимыг емтыс. Нāн ань Клавдия Ефимовна потре ловиньтэлың.

- Пāвлувт мāн лāщлакв өлантэв. Мис āгирищ оньщегум. Ам пўльницат рупитэгум. Ань ос тамле вāрмаль емтыс, рупатавт тōва хōтпат пōхын кētвёсыт. Сāртын āгмың хōтпат пўльницат хуясыт, тот пусмалтавёсыт. Ань ты вāрмальёл-пōилттавес. Тōва мāнь лēккарыт рупата тāл хулытсыт.

Мāн пўльницав кит накла ййв колт өлыс. Ётылнув йильпи кирпичиң кол үнттувес, пўльницавтув

вāнтлуптавес. Таи ёмас, лошит кол, колнаканэ посыңыт, āгмың хōтпат тот пусмалтаңкве сака ёмас. Тувыл ань ты нактосмōтяныглēккар пўльницан рупитаңкве ёхтыс. Ты ойка Астрахань үсныл өлы. Ам номсэгум, манрыг тапалыт мāныл хащтал мāхум рупитаңкве тыг вōвавет, мāнки хōтпанув, тыт рупитанувыт ке,

ёмаснувөг өлнүв.

Тувыл ань пāвылт тамле вāрмаль өлы, мāхум сāвыңпāлэ рупата ат оньщегыт. Хўл алышлым, вōраим, лāхыс атым ос пил вāтым өлэгыт. Мōт щирыл олн сēлуңкве нэмхотмус, ты хосыт та өлэв.

Ам пўльницат ставка охса щирыл акушерырүпитэгум. Ты урыл лāвуңкве вēрмэгум, ань юи-өвыл тāлытт мощьца нāврам самын паты. Пāвлув яныг, атсāt арыгкем хōтпа өлы. Мōлты тāл сыс туп хōт нāврам самын патыс. Пāвлув мāгыс ты сака мощьца. Мāньлат мāхманув таимāгыс сāв нāврам оньщүңкве ат таңхегыт, рупата шар āтим. Тувыл ань ят хўл ос сака мощьца пўхты, мāхум туп тэнэ сāвит алыщлэгыт».

Клавдия Ефимовна ойкатэ Вячеслав Юрьевич Сайнахов, āще өпарищ наме Хозумов өлыс, тав Хорыңпāвылтыныгмас. Рўтанэ Саранпāвылт ос Сўкырьят өлэгыт. Тāн колтагланылт ат нāврам яныгмасыт. Мāнь порат Хорыңпāвылт өлсыт. Ётыл, колхоз өмтнэ порат, тāн пуссын Лōпмусн вāнтлысыт. Лōпмуст тав кина суссылтан хōтпаг рупитас.



Тэн Клаватэнтыл хунь Няхщамвōльн ёхтысыг, тот рупата āтим өлыс. Таимāгыс тав тот ат рупитас. Тувыл Саранпāвылт экспедициян рупитаңкве патхатыглас.

Вячеслав Юрьевич яныг эще, Лариса Юрьевна, Хулюмсунт пāвылт өлы. Мāньнув эще, Фаинатэ, Надым үст өлы. Тэн сас щемьяныг.

Хулюмсунт пāвылт өлнэ эще палт Яков āпщитэ өлы. Там мāньтагыл āгм нупыл харты, ань увщитэн оньщаве. Лариса āгитэ Света сака номтыңыг яныгмас. Школат ёмашакв ханищтахтас, āстламе юи-пāлт Норвегия мāt хōн лāтың толмашлан хōтпаг элаль ханищтахтас. Ань Санкт-Петербург үст өлы, хотты мāt ты вāрмальщирылрүпиты. Тав сāв хōн лāтың вāг.

Экваг-ойкаг акв пыг оньщег, наме Миша, тав ос щемьян тагыл Няхщамвōль пāвылт өлы. Тав Ханты-Мансийск үс лēккар училищат лаборантыг ханищтахтас. Ты коньпал автомеханикыг ханищтахтас. Экватэ Лōпмус пāвылныл өлы, наме Юля, āги өпарищ наме Хозумова. Тэн кит нāврам оньщег.

Клавдия Ефимовна ойкатэнтыл хус арыгкем тāл Няхщамвōльт аквэет өлсыг. Вячеслав Юрьевич āтимыг өмтме мāгыс мāнтавөн сым шаргын лāтың кētэв. Ты ятил мāньщи колтагыл пустагыл вос өлы, Нāянылн-Отыранылн вос ўргалавет.


**Николай
МЕРОВ**

Тав щань латңетыл пұмщалахты

Молалнув ищхипың
ут хосыт ам Вален-
тин Демин ёт вайхатасум.
Тав урётыл анумен Со-
фья Власенкова (Руко-
ва) потырталыс. Тэн сас
маныщи хотпаг. Софья
Ильинична ань Калуж-
ский область Жиздра ўст
олы. Мён тав ётэ рұтыңыщ
олымён. Ос Валентин тав
ванэ хотпатэ. Ты маньлат
пыг Ивдель ўст олмет
анумен свониталыс, мён
тонт мощ потыртасмён ос
тувыл ищхипың ут хосыт
ам таве олупсатэ урыл ём-
щакв китыгласлум.

Молты ювле хультум тал
пасныл маньщи латың так-
ви ханищтаңкве овылтаме.
Тав эрнэ ханищтан нэпакейт
хонтыс, матыр-ати тэлал акваг
пұмщалахтас, ос тоха та элалъ
ман латңув ваңкве патыстэ. Ва-
лентин ань ищхипың ут хосыт
маньщи газетав ловиньтаңкве
вөрми. Тувыл щань латың элалъ
тотнэ магыс тав такви номыл-
матан маньщи потыр-охсат,
мөйттыт хансуңкве патыс. Сыре-
сыр руц потрыт, стихыт тав он-
толов талныл хансы.

Такви урёт пыг таи потыртас:
«Ам хус талум товлыс, Дятлово
павылт самын патсум. Ты павыл
Московский область Зарайский



районт олы, ты атам тав самын
патум павлэ, тав руц ойка. Омам
Свердловский область Ивдель-
ский районт Бахтияровыт олум
маньыл олыс. Тав маньщи нэ. Ты
вармалъ ам туп молты тал тара-
паттыслум. Анумен сака пұмаш
олыс, та пасныл ам акваг маньщи
махум овылтыт номсахтуңкве
патсум, мирув олупса, щань
латңув ханищтаңкве патыслум.

Ман щёмьявт нила хотпа,
тии атам, омам, ам ос апишм.
Щашёква, опа ос оныщегум. Ам
школат онтолов класс асталасум,
тувыл нила тал техникумыт
ханищтахтасум. Ты тал таве
астиласлум, ань рұпата кинсегум.
Амки леккарыг олуккве таңхегум,
махум пусмалтаңкве ос тананылн
нётуңкве патегум».

Ос анемүнтнув Валентин Де-
мин маньщи латңыл такви хан-
сум мөйтэ кетыстэ. Нан ань ты
мөйт ловиньтэлын.

Салыт үрнэ ос воряан хумыг

Салыт үрнэ хум ос воряан
хум олсыг. Акв ляпат олсыг.
Аквнакт салы үрнэ хум йиль-
пи кол ўнттуңкве тахмаяс, колэ
пёсыг ёмтыс. Эрнэ ут, матыр
вис ос рұпитаңкве патыс. Акв
хотал вәри, китыт хотал вәри.
Нэматырыг ат ёмты. Акв хотпан
рұпитаңкве тәрвитың. Тав нор
тармыл ўнтыс ос та тысты. Тара
воряан хум ёмыс. Тав салы үрнэ
хум кәсаластэ ос китыглытэ:

- Паща олэн, рума. Наң манрыг

тыстэгын?

- Ос хумус ат тыстуңкве?
Йильпи кол ўнттуңкве таңхегум,
колум пёс, шар люлиг ёмтыс. Туп
нэматыр вәруңкв ат вөрмәгум.
Анумен акваг тәрвит. Мощёртын
тэлыиг ты ёмты.

- Ул тыстэн! Ам наңын нётегум.

Воряан хум хұрум пыганэ
вөвсанэ. Аквёт кол ўнттуңкве
овылтахтасыт. Рұпатаныл
кұпнитыг минас. Тан молях кол
ўнттысаныл. Нётнэ, рёгың кол
ўнттысыт. Салы үрнэ хум хот-
щәгытс, лавыс:

- Пұмашипа, юрт. Наң анумен
ат ке нётсын, колтаглум тэлы
польнуве.

- Пұмашипа латың ул лавён. Ам
юртумн акваг щәгтым нётегум.

Талэ-туве минас. Аквнакт салы
үрнэ хум воряан хум колэ ляпат
минас ос воряан хум тыстым
кәсаластэ.

- Наң манрыг тыстэгын? Ма-
ныр ёмтыс? – салы үрнэ хум ки-
тыглахты.

- Ос хумус ат тыстуңкве? Ты
тал воряан вармалъ люль. Вөруй
ат ликмыглалы. Ам ворт ты кос
ёмыгтәгум ос нэматыр кәтн
ат паттыгләгум. Ам колтаглум
тәтәл ты хулыты.

- Ул тыстэн. Ам ётум минэн.

Тән салы үрнэ хум палт
ёхтысыг. Салы үрнэ хум сав салы
оныщи, тав лавыс:

- Манах салы эри, вүен. Наң
колтаглын тәтәл воссыг ул вос
олы.

Воряан хум салыт висанэ.

- Юрткве, пұмашипа. Ман ань
тәтәл ат шуңкырлэв.

- Пұмашипа латың ул лавён.
Ам юртумн акваг щәгтым
нётегум.

Та пасныл сав тал минас.
Салы үрнэ хум ос воряан хум
колтаглагёныл ёт ань тыг мус
олэгыт. Халэнт юртыңыщ олэг,
нуса ат вагыг.

Тамле пұмаш мөйт Валентин
маньшиләтңылты хансыс. Тавён
ман ос яныг пұмашипа латың
кётэв. Тав такви щирыл тахнэ
номтанэ тәлаг вос ёмтәгыт. Пус
кәт, пус лагыл, Төрүм ёт, Отыр ёт!

Тамара МЕРОВА



СОССАҢ МИР КУЛЬТУРА

Соссаң махманув муйлысыт

Ты этпос овыл хоталыт Ханты-Мансийск үсн Луимә, Сибирь ос Дальний Восток маныл мощаг хультум соссаң махум муйлуңквеёхталасыт. Тывармалъ руц ширыл «Северное сияние» намаим олыс. Махум Алтай, Таймыр, Камчатка, Ямало-Ненецкий округытныл олсыт. Тананыл Мария Кузьминична Волдина, яныгпала ханты эква, сымың латңыл янытласанэ. Тав ёнгын колэ «Ешак най» нам оныщи. Ты щёмыяң ёнгын кол округувт олнэ мирн ёмщаквег ваве.

Касың маныл ёхтум махум ййквсыт, саңквылтапыл

саңквылтасыт ос эрыг эргысыт. Тан нупыланыл сунсуңкве сака мустыс. Ты вармалъ таимагыс щёпитавес, касың мир халанылт журтыңыщ вос олсыт. Овлэт тан «Ма-вит ос элумхолас» нампа пёс пормас атнэ музей колт ййквсыт. Тувыл Октябрьский ос Нефтеюганский районыгн элалъ муйлуңкве ялсыт. Мотыт хотал Ханты-Мансийск үсн ювле ёхтысыт. Тывт юи-овыл хотал яныг концерт щёпиталсыт. Ты пумаш вармалъ сунсуңкве сав мир атхатыглас.

**Николай
МЕРОВ**



Сым щаргын латың

Ты этпос хотхуйпловит хоталэт Ханты-Мансийск үст маньщи хотпав Владимир Иванович Шесталов атимыг ёмтыс. Тав яныгполь этпос 28 хоталэт 1964 талт Тюмень үст самын патыс. Та порат атятэ Юван Николаевич Шесталов тот педагогический институтт ханищтахтас. 1971 тал щёмыяныл Санкт-Петербург үсн вантлыс, Владимир Иванович тот яныгмас. Ват нупыл хурмит талэ товлуме порат тав Ханты-Мансийск үсн вантлыс.

1987 талт тывт педучилищат ханищтахтуңкве овылтахтас. 1989-1990 талытт маньщи мирув эрыгсов таныт ос эргыт ханищтаңкве патыс. Ты юи-палт Владимир Иванович Санкт-Петербург үст олнэ А.И. Герцен нампа институтт ханищтахтас. Тувыл 1996 талт Петрозаводский консерваторият ханищтахтуңкве

овылтахтас, тот эрыг вармалъ ванэ яныг хотпат ёт вайхатуңкве патыс. 2011 талт искусствование кандидат намыл майвес. Сав тал искусства школат рупитас, няврамыт саңквылтапыл таныт саңквылтаңкве ханищтасанэ.

Владимир Иванович тұлыглахтан вармалъ ват нупыл ат тал ханищтас, маньщи эргыт, ййквыт ханищтас, пуссын нэпакын хассанэ. Ты Най-Отырың мат тав щагтым ёмыгтас, рупататэ эруптастэ, ханищтам нявраманэ янытласанэ. Аще ма, аще щань латың сака эруптастэ, сака янытластэ, хотпа нупыл сымың элумхоласыг олыс.

Рұт хотпанэн мән сым щаргын латың кетэв, тав магсылэ мән сыманув ос щаргегыт.

**«Луимә сәрипос» ос «Ханты-ясаң»
газетаг редакцият рупитан махум**

НЯВРАМЫТ МӒГЫС

Ӧлнэ мӑвт хӱлӱм посың лӅңхе

Ханты-Мансийск ӱст Лопарева Хӱсхулыт «Дом-музей народного художника СССР В.А. Игошева» нампӑ кол ӧлы. Та колт ӧлыпыл пӧслым сӑвсыр яныг манос мӑнь хорамың лӧпсын нӧпакыт, хурит суссылтавет.

В.А. Игошев хурин сӑв мӑншыцианув пӧслысанӧ. Щар ӧвыл щӅс мӑншыт пӧлт тав 1954 тӧлт ӕхталас. Нӑхщамвӧль пӧвылт тав Степан Куриков, Максим Рокин, Тасмановыт щӅмьяныл ос мӧт мӑхум пӧслысанӧ. Нӑхщамвӧль школаттав мӑнь ӧгирищ пӧслыстӧ, хуритӧ «Озорница» намаястӧ. Ань мӑншытты музейн тӧнки йис ӧпаныл сунсуңкве ялантӧгыт. Ты мӑгсыл яныг пӱмашипа

та мӑхумн лӧвуңкве ӧри, хотьютты музей ӱнттын мӑгсыл сӑв ӧр пиныс.

Максим Рокин Нӑрныл Нӑхщамвӧль пӧвылн сӧлыянӧт нӧлул вӧгыс. 1931 тӧлт тав нӧ тотыс, ӧкватӧнтыл лов нӑврам янмалтасыг. Пӧвылн хунь ӕхтыс, китнакпа кол ӧвтыс, та порат купсат тӧн тамле колт ӧлсыт. Такви ос ӧлалъ сӧлы ӱрим Нӑрт яласас. Ты кол Владимир Игошев ӧс хурин пӧслыстӧ,

«Дом охотника М. Я. Рокина» намыл пиныстӧ. Ӧйка такви ос пӧслыма, та хури музейт ӧс ханы. Сӧлы ӱрнӧ хум ос 1974 тӧлт хурин пӧслыстӧ, «Максим Яковлевич Рокин» намаястӧ.

Ань мӑхум ты хурит нупыл сунсым ос китыглахтӧгыт, мӑншыт вӧрт ӧмыгтым хумус ат тыпӧгыт, хумус вӧганыл, хоты мӧт ӧлӧгыт. Вӧраян хум кӧсай ос щӅранка ке ӧншы, тав лылытӧ та нӧглы. Вӧрт акв пумтӧрс ке ӧлы, хӧт ӧлӧгын, торгамтаңкве рӧви ос ювле миннӧ лӅңхын хӧнтхатуңкве. Вӧраян мӑхум щӅпт

кӧсай ос щӅранка акваг ӧншыгыт. Тамле «лӅңх» мӑхум тӧнки юипӧланыл та хулытуптасаныл.

Ам мӑншы лӧтың ӧвыл тӧл ханищтылум, сӧртың саран лӧтың ханищтылум. Потыр мӑншы лӧтың толмашлаңкве щӧщӅквӧмн нӧтвӅсум, школат ос ханищтан нӧн словарь-нӧпакыл рӱпитаңкве ханищтавӅсум. Потрум тыщырыл та тӧлыс. Пӱмашипа.

АлӅна РОКИНА,
Нӑхщамвӧль пӧвыл школат ловит классыт ханищтахтан ӧги.

Ӧс я вӧтат ӱнлын пӧвыл

Октябрьский район Карымкары пӧвылт ань акв сӧтыра арыгкем ӧлумхӧлас ӧлы. Ты пӧвылкве урыл 16-17 нот порат тӧратым нӧпакыт хансым ӧлыс, тӧнт ханты мӑхум ты пӧвыл Каринг-вош намаясаныл. Пӧвыл ляпат мӑнь я ӧвты, тот кӧрай хӱл сака сӧв ӧлыс. ПӅс порат пӧвыл пӧхат ялпың мӧ ӧлыс, сӧвсыр мӧныл хантыт тӧнки Нӧй-Ӧтыраныл нупыл пӧйкшуңкве тув ӕхталасыт. Ань тот ӧлнӧ хантыт мӧт мирыт халн тӧлыгласыт, тӧнки пӅс йис вӧрмаляныл нупыл сака ат сунсӧгыт, щӧнь лӧтӱыл ат потыртӧгыт. Тыи мӑгсыл Карымкары ань руш пӧвлыг ловиньтахты, ханты мӑхмытыл туп наме хулытыс.

Людмила ТАСМАНОВА



Луима сӧрипос
(Северная заря)
№20 (1086), 24.10.2014
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Главный редактор –
Решетникова Р.Г.
Телефон (3467)33-36-82
И.о. заместителя главного
редактора – **Узель В.В.**
Телефон (3467)33-22-72
Ответственный секретарь –
Ромбандеева С.М.
Телефон (3467)33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
kms.admhmao.ru
Отпечатано:
ОАО «Издательский дом
«Новости Югры» г. Ханты-
Мансийск», ул. Мира, 46.

Подписано в печать:
по графику 22.10.2014 г.
в 15.00.; фактически
22.10.2014 г. в 15.00.
Индексы **04399, 54399**
Тираж **1750 экз.**
Заказ **1414**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.